

BILTEN

www.kakanj.com.ba

Godina III, broj 16

septembar 2010. g.

OPĆINA



KAKANJ

Besplatan primjerak

POTPISAN UGOVOR O REALIZACIJI PROGRAMA PRIJATELJSKOG OKRUŽENJA




ZAPOČELA IZRADA REPLIKE STEĆKA IZ ZGOŠĆE



IZGRAĐENE KASKADE U KORITU ZGOŠĆE



RIJEKA BOSNA NAKON ČIŠĆENJA OBALA ZASJALA NOVIM SJAJEM



BILTEN

OPĆINE KAKANJ

interno informativno glasilo

OPĆINA KAKANJ

Alije Izetbegovića 123

72240 Kakanj

Tel. 032/771-800, 771-801

Fax 032 771-803

www.kakanj.com.ba

e-mail: opcinaka@bih.net.ba

IZDAVAČ

Općina Kakanj

REDAKCIJA BILTENA

OPĆINE KAKANJ:

Evelin Memić

Azra Fejzić

Mersud Kovač

Tel: 032/555-301

Fax: 032/771-803

e-mail: opcinaka@bih.net.ba

evelin.memic@gmail.com


DTP I ŠTAMPA:

Labirint d.o.o. Zenica

labirintzenica@gmail.com

Tiraž:

1000 primjeraka



Zgoščanski stećak na mjestu pronalaska, fotos iz 1903. godine

U kakanjskom kraju u kojem su duševni mir i vječiti smiraj pro našli plemeniti srednovijekovni Bošnjani, već nekoliko mjeseci traje realizacija projekta Tajna zgoščanskih stećaka kojeg je pokrenulo Udruženje za kulturno naslijeđe „Art-Sef“, uz pomoć i podršku Općine Kakanj i drugih institucija.

Projekat koji je već dijelom realiziran obuhvata snimanje dokumentarnog filma o istraživanjima koja su provedena od 23. jula do 13. augusta 2010. godine u Zgošći, mjestu gdje su 1891. godine otkriveni stećci koji su svojom ljepotom i drugačijim načinom obrade dugo plijenili pažnju i budili zanimanje arheologa i historičara. Osim istraživanja, dokumentarni film će obuhvatiti čitanje natpisa sa zgoščanskog stupca metodom skeniranja, analizu starosti kostiju i



Kamen za izradu replike stećka iz Zgošće dovezen je iz Brnja na plato Doma kulture u Kakanju



Prsten pronađen tokom nedavnih istraživanja na lokaciji nekropole stećaka u Zgošći



Radi se o srebru visoke kvalitete

analizu artefakata koji su pronađeni tokom nedavnih istraživanja, te segment izrade replike stećka iz Zgošće.

Izrada replike započela je u ponedjeljak 20. septembra 2010. godine u dvorištu Javne ustanove za kulturu i obrazovanje u Kakanju.

Tokom izrade replike stećka iz Zgošće koja će trajati desetak dana, planirani su brojni sadržaji poput narodnog univerziteta tokom kojeg će, na mjestu izrade stećka, o bosanskom srednovijekovlju govoriti prof. dr Dubravko Lovrenović, prof. dr Emir Filipović i prof. dr Lejla Nakaš sa Filozofskog fakulteta u Sarajevu, Vojo Vušanović, pozorišni i likovni kritičar, te mr. Lidija Fekeža, arheolog Zemaljskog muzeja u Sarajevu. Planirani su i obilasci arheološkog lokaliteta u Zgošći i lokaliteta Vilin kamen u Brnju, promocija knjige prof. dr Dubravka Lovrenovića, promocija knjige o



Zgoščanski stećak u vrt Zemaljskog muzeja u Sarajevu prenesen je 1913. godine, fotos iz 1914. godine

Lazi Drljači, posljednjem bogumilu, izložba Zdravka Anića, muzičko-scenski program u kojem će nastupiti Nada Đurevska, Selma Alispahić, Vladimir Jokanović i

Adnan Mušanović, muzičko-scenski nastup Dramskog studija iz Kaknja, planiran je i koncert Sinana Alimanovića, te koncert jedne kakanjske grupe...

Iz Kaknja, koji se uz susjedne općine smatra kolijevkom Bosne, ovih dana šaljemo poruku da smo odlučni u čuvanju historijskih činjenica koje govore o srednjovjekovnoj bosanskoj posebnosti, viševjekovnom kontinuitetu postojanja naše domovine, o dobrim Bošnjanima i njihovom hrabrom usudu da, u vrtlogu srednjovjekovnih burnih zbivanja, sačuvaju vlastiti bogumilski kulturni identitet. Istraživanjima u Kaknju pišu se novi detalji bosanskohercegovačke historije, upotpunjava se mozaik naše spoznaje o nama, piše se istina o Bosni, u inat onima koji falsifikuju historijske fakte i negiraju kontinuitet postojanja Bosne kroz vijekove.

Potpisani Program prijateljskog okruženja sa Općinom Kakanj za izgradnju Bloka 8 u Termoelektrani Kakanj i Ugovor o realizaciji ovog Programa

Program prijateljskog okruženja sa općinom Kakanj za izgradnju Bloka 8 u Termoelektrani Kakanj i Ugovor o realizaciji ovog Programa potpisani su u ponedjeljak, 20. septembra 2010. godine, u uredu općinskog načelnika Mensura Jašarspahića Surijsa. Program i Ugovor su potpisali općinski načelnik Jašarspahić i Amer Jerlagić, generalni direktor JP „Elektroprivreda BiH“.

Potpisivanju Sporazuma prisustvovali su saradnici načelnika Jašarspahića, te gosti: Nihad Kadić, izvršni direktor za proizvodnju, mr. Almedin Skopljak, v.d. izvršni direktor za kapitalne investicije Elektroprivrede BiH, Jusuf Merić, rukovodilac Sektora za pripremu i izgradnju termoelektrana, te Mirsad Jašarspahić, direktor RMU Kakanj.

Prioritetni projekti mjesnih zajednica iz okru-



Detalj sa potpisivanja Programa i Ugovora

ženja Termoelektrane Kakanj koji će biti finansirani od strane Elektroprivrede kroz Program prijateljskog okruženja definirani su Odlukom Općinskog vijeća Kakanj od 31. maja 2010. godine.

Utvrđeni infrastrukturni objekti u mjesnim zajednicama će se finansirati sredstvima JP „Elektroprivreda BiH“ Sarajevo u okvirnom iznosu od 3.000.000,00 KM.

U okviru implementacije Programa prijateljskog okruženja i izgradnje infrastrukturnih

objekata iz sredstava JP „Elektroprivreda BiH“, opredjeljena sredstva raspoređuju se na sljedeće mjesne zajednice: Mjesna zajednica Papratnica 500.000,00 KM, Mjesna zajednica Termoelektrana 500 000 KM, Mjesna zajednica Čatići 700.000 KM, Mjesna zajednica Slapnica 700.000,00 KM, Mjesna zajednica Doboj 400.000,00 KM, Rekonstrukcija grijanja 100.000 KM, Zamjena azbest - cementnih cijevi 100.000 KM.



Program i Ugovor su potpisali načelnik Jašarspahić i Amer Jerlagić, generalni direktor JP Elektroprivreda BiH

Putuju podaci, a ne građani!

Sve usluge koje su ostvarivali u Centru za pružanje usluga u Kaknju, građani općine Kakanj uskoro će moći ostvariti u matičnim uredima kojima geografski pripadaju

Zahvaljujući dobroj saradnji i zajedničkom finansiranju vrijednih projekata između Projekta upravne odgovornosti - GAP i Općine Kakanj, kakanjska lokalna zajednica sve više ostvaruje strateški cilj definiran Strategijom razvoja koji teži efikasnošću, odgovornošću i transparentnošću općinske uprave koja odgovara na potrebe svih građana i omogućava im sudjelovanje u javnim poslovima.

Nakon realizacije kapitalnih projekata, izgradnje mosta u Krševcu, puta u MZ Podgora, naselje Gora, te Ambulante porodične medicine u Doboju, u fazi finalizacije su i drugi projekti koje zajedno finansiraju GAP i Općina Kakanj.

Potpisivanjem Memoranduma o razumijevanju između Općine Kakanj i Projekta upravne odgovornosti - GAP 16. aprila 2008. godine,



Zahvaljujući pomoći GAP-a Kakanj je dobio savremeni Centar za pružanje usluga građanima

te usvajanjem Općinskog akcionog plana kojim je Općinsko vijeće Kakanj, na osnovu prijedloga Radne grupe koja je istražila mišljenja građana o prioritetima unapređenja uprave, odabralo projekte iz ponuđenog kataloga usluga GAP-a, započela je implementacija nekoliko projekata koji se ovih dana privode kraju.

„Skeniranje, digitalizacija, te razvoj elektronske biblioteke“ naziv je projekta kojim će se, zasigurno, povećati zadovoljstvo

građana pruženim uslugama i povećati efikasnost rada službenika. Projekat omogućava olakšan i ubrzan rad na procesuiranju predmeta jer omogućava formiranje elektronske verzije predmeta u vidu skeniranih akata. U prvoj fazi, planirano je skeniranje dokumenata koji se trajno čuvaju i kod kojih postoji potreba za čestim uvidima kako bi se na bazi toga izdavali drugi akti (npr. urbanističke i građevinske dozvole...).

Dosadašnja ograni-

čena mogućnost pružanja usluga u mjesnim uredima u Brnjicu, Kraljevoj Sutjesci i Bilješevu značila je putovanje građana do Centra za pružanje usluga u Kaknju kako bi dobili građevinsku dozvolu, podnijeli zahtjev za jednokratnu novčanu pomoć, zahtjev za pomoć pri saniranju šteta od elementarnih nepogoda...

Realizacijom projekta „Umrežavanje mjesnih ureda sa Centrom za pružanje usluga građanima“ sve usluge koje su ostvarivali u Kaknju, u Centru za pružanje usluga, građani će moći ostvariti u mjesnom uredu kojem geografski pripadaju. Osim toga, osoba koja je upisana u matične knjige rođenih npr. u Kraljevoj Sutjesci moći će dobiti rodni list ili uvjerenje o državljanstvu u matičnim uredima u Brnjicu, Bilješevu ili Kaknju, i obrnuto. Radi se, dakle, o ostva-

Obavještenje o otvaranju depozitnog računa za prikupljanje javnih prihoda Općine Kakanj

Obavještavaju se sva pravna i fizička lica da je Općina Kakanj, postupajući po odredbama Zakona o pripadnosti javnih prihoda u FBiH („Službene novine FBiH“, broj 22/06, 43/08 i 22/09) i Pravilnika o načinu uplate javnih prihoda budžeta i vanbudžetskih fondova na teritoriji FBiH, a posebno Pravilnika o izmjenama i dopunama Pravilnika koji je objavljen u „Službenim novinama FBiH“, broj 50/10 od 16. augusta 2010. godine, otvorila:

Depozitni račun za prikupljanje javnih prihoda Općine Kakanj kod Raiffeisen Bank d.d. - Filijala Kakanj, broj 1610550000100718.

Svi subjekti koji vrše uplate javnih prihoda Općine Kakanj dužni su iste uplaćivati na ovaj depozitni račun počevši od 17. augusta 2010. godine.

Služba za finansije Općine Kakanj

renju principa savremenih administracija koji kaže „putuju podaci, a ne građani“.

„Izrada plana privlačenja investicija“ naziv je projekta koji je već realiziran. Kakanj ima izrađen Plan privlačenja investicija kojim su potencijalnim investitorima predstavljeni resursi općine Kakanj, te predstavljena općina Kakanj kao pogodan ambijent za investitore.

Zahvaljujući pomoći GAP-a, kroz projekat „Unapređenje sposobnosti Općine Kakanj za upravljanje informaci-



Detalj iz Centra za pružanje usluga građanima

onim tehnologijama“, unaprijeđen je informacijski sistem koji se zasniva na primjeni modernih računarskih i mrežnih tehnologija.

Pomenute aktivnosti predstavljaju drugu fazu jačanja općinskih


kapaciteta. U prvoj fazi Projekat upravne odgovornosti-GAP finansirao je opremanje i materijalno-tehničko osposobljavanje Centra za pružanje usluga građanima, formiranje elektronskih matičnih knji-

ga rođenih, vjenčanih i umrlih, nabavku hardvera i softvera... U prvoj fazi GAP i Općina Kakanj su zajedno finansirali i vrijedne kapitalne projekte: „Izgradnja Ambulante porodične medicine u MZ Donji Kakanj“, „Toplifikacija Doboja IV“ i „Sanacija krova Gradske sportske dvorane“. Donatori GAP-a su Američka agencija za međunarodni razvoj (USAID), Švedska agencija za koordinaciju međunarodnog razvoja (SIDA) i Ambasada Kraljevine Holandije (EKN).

Zabilježeno na Teševu

Započela izgradnja spomen-obilježja u obliku planine u znak sjećanja na Ediba Dogdibegovića Dipija

U znak sjećanja na kakanjskog šehida Ediba Dogdibegovića Dipija, u neposrednoj blizini spomen-ploče koja je prije nekoliko godina postavljena na mjestu njegove pogibije na Teševu, uskoro će biti izgrađeno spomen-obilježje. Započeli su radovi na pripremi terena, te čišćenju pristupnog puta. Rahmetli Edib Dogdibegović je volio



Skica spomen-obilježja čija izgradnja počinje



Spomen-ploča na mjestu pogibije Ediba Dogdibegovića Dipija



Spomen-obilježje će se graditi u blizini spomen-ploče na Teševu

planinarenje, bio je aktivni član PD „Bobovac“, pa će, u znak sjećanja na ovog istinskog kakanjskog patriotu, spomen-obilježje svojim izgledom asociirati na planinu i planinarenje. „Edib Dogdibegović Dipi poginuo je kao komandir desetine na Teševu u borbama protiv HVO-a 17. oktobra 1993. godine. Ukopan je 18. oktobra 1993. godine na

mezarju rodnog Doboja. Bio je društven momak koji je svakome htio pomoći i veliki radiša. Po završetku agresije na BiH, u znak sjećanja na njega, Planinarsko društvo svake godine organizira memorijalni pohod na Teševu pod nazivom „Dipijevim stazama“, zapisano je u knjizi „Kakanjski šehidi i poginuli borci 1992-1995.“ autora Dženana Kubata.


Vijesti iz Centra za pružanje besplatne pravne pomoći

U Centru za pružanje besplatne pravne pomoći građani mogu dobiti pravne savjete, te pismene podneske (tužbe, žalbe, molbe i sl.) i to besplatno

Na godišnjem nivou Centar posjeti više od 300 građana

Svake sedmice u mjesecu, četvrtkom od 15,30 sati pa sve dok ima zainteresiranih stranaka, u Centru za pružanje besplatne pravne pomoći u Matičnom uredu u Kakanju, građanima općine Kakanj, ali i susjednih općina, pomaže diplomirana pravica Alisa Bečirhodžić, zaposlena kao državna službenica u Općini Kakanj, na mjestu šefa Odsjeka za boračko-invalidsku zaštitu.

U Centru za pružanje besplatne pravne pomoći građani mogu dobiti pravne savjete, te pismene podneske (tužbe, žalbe, molbe i sl.) i to besplatno. Centar je formiran od strane švedskog udruženja „Kvina till kvina“ i nosi naziv Pravna



Centar za pravnu pomoć pruža pravne usluge iz svih oblasti prava

pomoć žena-ženi. Na godišnjem nivou Centar posjeti više od 300 građana. U toku ove godine do današnjeg datuma zabilježena je posjeta oko 250 stranaka sa cijelog područja općine Kakanj, pa čak i sa područja susjednih općina koje nemaju nikakvu organizaciju/udruženje/instituciju koja se ba-

vi besplatnom pravnom pomoći. Mada je zamišljeno da se pravna pomoć pruža ženama, pomoć se pruža jednako i muškarcima.

Lica koja dolaze u Centar za besplatnu pravnu pomoć nemaju osnovnih sredstava za život, a pogotovo za plaćanje advokatskih usluga.

Mnoštvo zadovoljnih ljudi kojima se pruži

pomoć u Centru i kojima se uštedi po nekoliko stotina maraka je pohvala sama za sebe.

Centar za pravnu pomoć pruža pravne usluge iz svih oblasti prava (porodično, nasljedno, izvršni postupak, krivično, parnični i vanparnični postupak, ostvarivanje prava iz oblasti socijalne politike itd ...)

Obavijest iz JP „Kakanj-sport“

Novoizgrađeni sportski kompleks, na lokalitetu nekadašnjeg Partizana, otvorio svoja vrata

Uvažavajući činjenicu da su brojni uspješni kakanjski sportisti najbolji ambasadori i pronositelji dobrog glasa o Kakanju, snažno podržavajući razvoj infrastrukture koja je neophodna za omasov-

ljenje svih sportskih disciplina kako bi se kakanjska mladost usmjerila sportu i zdravom načinu življenja, Općina Kakanj intenzivno radi na unapređenju sporta u kakanjskoj lokalnoj zajednici,

kako izgradnjom objekata tako i finansijski.

Još jedan veliki rezultat ovakvog opredjeljenja je vidljiv. Kakanj je dobio nove sportske terene u sklopu kompleksa City Center One (zgrada


Konzuma, lokacija nekadašnjeg Partizana). Ovi sportski tereni, zatvorenog i otvorenog tipa, su završeni tako da novi kakanjski sportski objekat otvara vrata profesionalnim sportistima, re-



Nova sportska dvorana na lokaciji nekadašnjeg Partizana



Općina Kakanj snažno podržava razvoj infrastrukture neophodne za omasovljenje svih sportskih disciplina



Detalj iz nove sportske dvorane



Zabilježeno tokom obilaska novog sportskog objekta

kreativcima, omladini, djeci i svim drugim ljubiteljima sporta.

Novi kakanjski sportski objekat, na lokalitetu nekadašnjeg Partizana, sa radom je počeo u ponedjeljak 13. septembra 2010. godine. Sve informacije o korištenju otvorenih sportskih terena i zatvorene sportske dvorane zainteresirani mogu dobiti u JP „Kakanj-sport“ putem telefona sa brojem 032/557-151.

Novi sportski tereni na

načne odluke Općinskog vijeća Kakanj koja će definisati ko upravlja ovim sportskim objektima, kakve su cijene korištenja dvorane i vanjskih terena, ko ima pravo na besplatne termine korištenja... Ja sam obećao i predložiću Općinskom vijeću Kakanj da se Odbojkaškom klubu invalida Kakanj 92 osigura besplatno korištenje novih sportskih terena, a pokušat ćemo naći i najbolje rješenje kako bismo osigurali da odre-



Vanjski tereni na krovu CC1

lokaciji nekadašnjeg Partizana su otvorili svoja vrata. No, odmah su se pojavila razmišljanja i nagađanja o cijenama i uvjetima korištenja sportskih terena, na internet-forumima mogu se čitati mišljenja da će “biti cijene da boli glava” itd.

“Nakon završetka procedure prijenosa vlasništva nad sportskim terenima u sklopu CC1 na Općinu Kakanj, iskoristio sam zakonsku mogućnost, te zatražio od JP Kakanj-sport da upravlja novim sportskim terenima do ko-

đeni broj ratnih vojnih invalida radi u novom sportskom kompleksu. U početnoj fazi, ja sam to tražio od direktora JP Kakanj-sport, vanjski tereni će biti besplatni za djecu koja se žele igrati, do konačne odluke Općinskog vijeća koja će i ovo regulisati. Moja želja je da termini korištenja sportskih terena ne budu skupi i da budu prihvatljivi svima”, odgovorio je na nedoumice i glasine općinski načelnik Mensur Jašarspahić Suri.

Izveštaji inspektora

U ulici Selima ef. Merdanovića zabilježeno 28 slučajeva bespravne gradnje, u Podbjelavićima urbanističko-građevinska inspektorica Leila Karamehić bila meta verbalnog napada

Urbanističko-građevinska inspektorica Leila Karamehić izvršila je, tokom mjeseca augusta 2010. godine, inspekcijske preglede u sljedećim naseljenim mjestima:

u ulici Selima ef. Merdanovića radi bespravne dogradnje stambenih objekata, izgradnje ograde, garaža, poslovnih objekata, predulaza, stepeništa (u ovoj ulici zabilježeno je 28 slučajeva bespravne gradnje), u Obrima radi izgrađenog pomoćnog objekta blizu pruge, u Podbjela-

vićima radi izgradnje poslovnog objekta blizu pruge, u ulici Alije Izetbegovića radi bespravnog pretvaranja stambenog prostora u poslovni prostor, te postavljanja stepeništa na površini koja se vodi kao državna svojina, u Kujavču radi nelegalne izgradnje garaže, u Sopotnici radi nelegalne izgradnje pomoćnog objekta i radi nasipanja zemljanog materijala na obalu puta, u Povezicama radi uzurpacije zemljišta u državnoj svojini...

Inspektorica je donijela 31 rješenje kojim se nalaže investitorima da podnesu zahtjev za legalizaciju bespravno izgrađenih objekata, 2 rješenja o uklañanju bespravno izgrađenih objekata, uputila je 13 obavijesti podnosiocima zahtjeva o poduzetim radnjama na osnovu izvršenog inspekcijskog pregleda. Tokom obavljanja inspekcijskog pregleda u Podbjelavićima inspektorica je bila meta verbalnog napada.

Izveštaj tržišne inspektorice za mjesec august

Bespravno zauzeće javne površine, psovke, prijetnje, negodovanje, prijetnje samoubistvom...

Tokom kontrole štandova koji su postavljeni u vrijeme manifestacije „Kakanjski dani trgovine i kulture“, tržišna inspektorica Nizama Buza suočila se sa brojnim problemima. Zabilježen je veliki broj slučajeva bespravnog zauzimanja javne površine u svrhu prodaje robe. Nervoza, prijetnje, psovke i drugi vidovi nedoličnog ponašanja bili su svojstveni osobama koje su bespravno zauzimale javnu površinu. Uz pomoć policije, inspektorica je ipak uspjela izvršiti svoje radne zadatke kako bi se ispoštovale zakonske odredbe. Tokom manifestacije „Kakanjski dani trgovine i kulture“ zabilježena su dva slučaja bespravne naplate parkinga od strane dva privredna subjekta. Nakon izdavanja rješenja o zabrani rada ovi privredni subjekti su prestali sa ovom djelatnošću.

Tokom augusta tržišna inspektorica izvršila je

inspekcijski pregled u Karaulskom Polju u vezi odlaganja kokošijeg đubriva u blizini rudničke kapije, organizatoru teferića na Mokroj njivi inspektorica je naložila da počisti smeće koje je ostalo nakon teferića, na Drijenu je izvršen inspekcijski pregled u vezi gradnje u blizini izvorišta...

Tokom kontrole bespravne prodaje i zauzimanja javne površine na gradskom šetalištu, 19. augusta 2010. godine zabilježena je incidentna situacija kada je jedan prodavač koji je bespravno zauzeo javnu površinu uzeo nož i prijetio da će izvršiti samoubistvo govoreći kako nema od čega živjeti i hraniti višečlanu porodicu.

Inspektorica je krajem augusta vršila kontrolu prodaje robe za vrijeme održavanja tradicionalnog mevluda u Kraljevoj Sutjesci (prodaja je bila zabranjena od poljanskog mosta do džamije).

Poziv izbjeglicama iz BiH, raseljenim osobama u BiH i povratnicima

Pozivamo izbjeglice, raseljene osobe i povratnike da izvrše registriranje prijave za dobivanje pomoći za rekonstrukciju stambenih objekata, uništenih i devastiranih tokom ratnih zbivanja.

Prijave se dostavljaju na obrascu "prijave/izjave", koji je dostupan u svim općinama u BiH, regionalnim centrima Ministarstva za ljudska prava i izbjeglice BiH, diplomatsko-konzularnim predstavništvima u zemljama prihvata izbjeglica, na zvaničnoj web-stranici Općine Kakanj www.kakanj.com.ba, u Uredu za raseljena lica, izbjeglice i povratnike Općine Kakanj, te u uredima mjesnih zajednica.

Prijave se dostavljaju poštom ili lično na adresu: Općina Kakanj, Služba za boračko-invalidsku zaštitu, raseljena lica, povratnike i izbjeglice, Odsjek za raseljena lica, Alije Izetbegovića 123, 72 240 Kakanj.

Poziv je namijenjen za osobe sa prebivalištem, do 30.4.1991.godine, na području općine Kakanj, a koja je i općina povratka. Više informacija možete dobiti putem telefona sa brojem 032/771-808.

Komisija za prijavu, popis i evidentiranje povratnika

Izveštaji komunalne inspektorice Zahide Alić i vodnog inspektora Mirsada Delića

Općinska komunalna inspektorica Zahida Alić, tokom mjeseca augusta, izvršila je 10 kontrola po osnovu zahtjeva za izlazak na lice mjesta, ispostavila je 19 rješenja o otklanjanju nedostataka, izvršeno je 5 kontrola izvršenja rješenja ispostavljenih u julu...

Tokom trajanja manifestacije „Kakanjski dani trgovine i kulture“ inspektorica je vršila kontrolu zauzeća javne površine u svrhu prodaje robe, kontrolu održavanja čistoće na gradskim saobraćajnicama i drugim javnim površinama, kontrolu odvoza smeća...

Općinski vodni inspektor Mirsad Delić, tokom augusta, izvršio je inspekcijske uviđaje u Malješu sa ciljem provjere postojanja dokumentacija za kuće koje su



Više informacija o radu općinskih inspektora potražite na www.kakanj.com.ba

oštećene nakon izbijanja podzemnih voda, u Donjem Kaknju radi ometanja čišćenja obala Ribnice od strane dva mještanina, u Obrima radi kontrole vađenja šljunka, u Povezicama

radi nasipanja šljunka...

Izvršeno je 11 kontrola korištenja javnih površina, izvršena je kontrola postupka legalizacije mjesnih vodovoda u Bilješevu, Gori, Mramoru, Vukanovićima...



I putem foruma na www.kakanj.com.ba odgovaramo na upite građana

Poštovani građani! Službu za poduzetništvo, društvene djelatnosti, eko-zaštitu i inspekcijske poslove možete kontaktirati na telefone sa brojevima 032/771-827, 032/771-817 i 032/771-819. Sve nelegalne radnje i nesavjesne subjekte koje primijetite možete prijaviti, potpuno anonimno, u pisanoj formi, putem kontakt telefona, te putem foruma na službenoj web-stranici Općine Kakanj www.kakanj.com.ba. Općinski inspektori će provjeriti navode i poduzeti mjere u skladu sa nadležnostima. Zahvaljujemo na saradnji.

Vijesti iz Službe civilne zaštite

Grade se kaskade u koritu rijeke Zgošće

U blizini zgrade Općine Kakanj zabilježili smo radove na uređenju korita rijeke Zgošće. Radove, čiji je cilj, izgradnjom kaskada i usporavanjem protoka, zaštititi korito od razorne moći vodene bujice u periodu obilnih kiša, pokrenula je Služba civilne zaštite Općine Kakanj. Nakon izgradnje kaskada, planirani su i drugi radovi poput zamjene puknutih ploča kako bi se uredilo i zaštitilo korito Zgošće. Radove izvodi kakanjska firma „Trgošped“.



Radove izvodi Trgošped



Zabilježeno u blizini zgrade Općine



Cilj radova je zaštita korita, ali i postizanje estetske dimenzije

Vjenčani u augustu: Čestitamo mladencima!

U periodu 1 - 31. august 2010. godine, brak su sklopili: Sikira Osman i Ohran Arnesa, Kulović Nedžad i Fehrić Alma, Zahirović Mersudin i Škulj Samra, Veispahić Almin i Rizo Edna, Kubat Narcis i Alagić Đenana, Jašarspahić Kenan i Durmić Emi-na, Čelebić Ezudin i Hekić Mirsada, Bejtić Saim i Hrustić Mirela, Antunović Mladen i Bjelavčić Josipa, Škulj Emir i Begić Anela, Delić Almin i



Novi detalj u Matičnom uredu Kakanj

Poštovani građani! Centar za pružanje usluga građanima možete kontaktirati na telefon sa brojem 032/771-820. Telefonski imenik matičnih ureda: Kakanj 032/771-816, Brnjic 032/772-194, Kraljeva Sutjeska 032/ 779-202.

Karamović Dženita, Fafulić Nermin i Dedić Jasmina, Crnović Nihad i Hadžić Arnesa, Seferović Muhamed i Sejdić Zuhra, Hido Dženana i Brkić Ilhana, Begić Adem i Sarač Nerma, Veispahić Tarrik i Subašić Adisa, Zahirović Kenan i Šahinbegović Ilhana, Imamović Almir i Muhamedagić Irma, Subašić Enhar i Begić Dženita, Brnadić Ivan i Pavlović Julijana, Pipo Adnan i Čelebić Elvedina.

Akcija čišćenja obala rijeke Bosne u završnoj fazi

Pričaj Bosno kud god budeš tekla... pričaj Bosno svojim valovima...

Živopisna rijeka Bosna, sa čijih obala godinama strši okrutni mozaik svakovrsnog smeća, sija novim sjajem na dijelu vodotoka kroz općinu Kakanj budeći sjetu da će se jednog dana vratiti vremena kada se vodom iz rijeke mogla i žeđ ugasiti, i čovjek i duša osvježiti, i narod ponositi. Realizacija Projekta čišćenja obala vodotoka u FBiH koju je pokrenuo Fond za zaštitu okoliša F BiH privodi se kraju u dijelu koji se odnosi na općinu Kakanj. Prvom

fazom ovog projekta planirano je da se obuhvate dijelovi rijeka Bosne i Lašve sa ukupnom dužinom od cca 100 km. Na rijeku Bosnu otpada tri četvrtine prostora koji uključuje tri općine: Visoko, Kakanj i Zenicu. Cilj projekta je čišćenje obala rijeka Bosne i Lašve od otpadnog materijala koji je zaostao nakon poplava u periodu januar-mart 2010. godine, preventivno djelovanje i očuvanje voda, riječnih tokova, njihove flore i faune, te jačanje zakonskog okvira F BiH.



Rijeko Bosno...pod Igmanom svoj si izvor skrila...



Vijekovima život daješ svima...



Pričaj Bosno kud god budeš tekla...



Pričaj Bosno svojim valovima...



Na put se dugi zaputila...

Pored navedenog, ovim projektom dolazi do podizanja svijesti javnosti, te se pokušava umanjiti dosadašnja praksa nepravilnog odlaganja otpada, a time i smanjiti zatrpavanje

korita rijeka i potoka smećem. Fond za zaštitu okoliša FBiH za realizaciju projekta na teritoriji općine Kakanj izdvojio je 120 400 KM, dok je Općina Kakanj uložila 30 100 KM.

Federalni vodni inspektor Mirsad Smailagić boravio u Kaknju

Animalni otpad u rijeku Bosnu, sa mosta u Seoći, općina Visoko, odlažu fizička lica koja se nelegalno bave klanjem i prodajom mesa?

Nakon urgentnog zahtjeva Općine Kakanj, niza medijskih izvještaja i brojnih apela građana da se riješi problem prisutstva animalnog otpada u koritu rijeke Bosne, na lokalitetu MZ Papratnica i uzvodno, na teren je izašao Mirsad Smailagić, federalni vodni inspektor.

Inspektor je izvršio inspekcijski nadzor u dvije klaonice, u naselju Seoća, općina Visoko, uzvodno od lokacije na kojoj je evidentiran animalni otpad. U izvještaju inspektora se navodi da su evidentni ostaci animalnog otpada u rijeci Bosni, te da jedna klaonica u Seoći ima važeći vodni akt za ispuštanje tehnološke otpadne vode i da postupa po istom, da ima Ugovor o odvoženju animalnog otpada sa jednom zeničkom firmom, te da uredno plaća vodne naknade, dok druga klaonica, prema izvještaju inspektora, ne radi već osam mjeseci.

Inspektor navodi da ni u jednoj klaonici u vrijeme pre-



Iz godine u godinu isti problem, animalni otpad u rijeci Bosni

gleda nije bilo tragova odlaganja animalnog otpada u rijeku Bosnu, te izražava sumnju da animalni otpad u rijeku Bosnu, sa mosta u Seoći, općina Visoko, odlažu fizička lica koja se nelegalno bave klanjem i prodajom mesa.

„Vezano za ovaj problem potrebno je uključiti i kantonalne i općinske inspekcijske

potencijale (veterinarska, sanitarna, komunalna, tržna i vodna inspekcija), kao i aktiviste mjesnih zajednica kako bi se došlo do saznanja ko se sve bavi poslovima klanja životinja i odlaganja animalnog otpada po selima i iskontrolisati ih“, stoji u dopisu kojeg je Općini Kakanj dostavio Mirsad Smailagić, federalni vodni inspektor.

Gotovo svakodnevno vatrogasci su prinuđeni intervenirati i gasiti vatru na Vardi

Apeli usmjereni na buđenje svijesti onih koji pale vatre na Vardi nisu urodili plodom

Zbog sve učestalijih slučajeva paljenja vatre u naselju Varda, čiji dim naprosto zauguši okolinu, u nekoliko na-

vrata apelirali smo na svijest onih koji vrše spaljivanje otpada, plastike, gume i drugih materijala radi dobijanja se-

kundarnih sirovina pogodnih za prodaju, kao i na sve one koji imaju određene informacije da prijave općinskoj in-

spekciji počinitelje ovog krivičnog djela. Izvještaji Službe civilne zaštite Općine Kakanj govore da apeli, usmjereni na buđenje svijesti onih koji pale vatre na Vardi, nisu urodili plodom. Gotovo svakodnevno vatrogasci su prinuđeni intervenirati i gasiti vatru na Vardi. To je za sada jedina moguća mjera koja se može primijeniti s obzirom da je jako teško utvrditi počinitelja ovog nesavjesnog djela.

Namjerno paljene vatre na Vardi, koje zagušuju Kakanj, vatrogasci su gasili 7. januara, 24. marta, 4. aprila, 20. aprila, 10, 12. i 16. juna, 15. jula, 16. jula u dva navrata, 30. jula, 30. augusta, te 2. septembra 2010. godine. Stalne intervencije uzrokuju velike troškove za Općinu

Nakon što su se u javnosti pojavile informacije o pojavi divlje deponije dva kilometra uzvodno od Kraljeve Sutjeske, uz novu cestu koja vodi do Ratnja, općinski načelnik Mensur Jašarspahić Suri zatražio je od Odsjeka za inspekcijske poslove hitno poduzimanje mjera u skladu sa zakonom kako bi se riješio ovaj problem. Ovom prilikom, apelujemo na sve građane općine Kakanj da sve pojave, incidente, slučajeve i nesavjesne osobe koje uništavaju naš okoliš prijave (potpuno anonimno) općinskim eko-redarima koji će, nakon provjere činjenica, putem komunalnog inspektora, uputiti prijavu protiv nesavjesnih subjekata. Kontakt telefon: 061/967 066. Krajnje je vrijeme da se pokrene široka društvena akcija kako bi se zaustavilo uništavanje naše okoline.

Kakanj jer svako gašenje vatre podrazumijeva angažman najmanje tri vatrogasca i vatrogasnog vozila. Najviše boli činjenica da bi se moglo desiti da u vrijeme gašenja namjerno zapaljene vatre na Vardi negdje na nekom drugom mjestu izbije požar, pa da vatrogasci izgu-

be na vremenu dok stignu na mjesto intervencije.

Općina Kakanj zaista čini sve što je moguće učiniti u ovom trenutku i neće dozvoliti da nekolicina nesavjesnih građana na bilo koji način ugrozi pravo građana općine Kakanj na čist vazduh i zdravo okruženje.

U ulici Alije Izetbegovića postavljen novi eko-displej

Novi eko-displej postavljen je ovih dana u ulici Alije Izetbegovića u Kaknju. Ovaj displej nakon testne faze prikazivat će trenutne vrijednosti koncentracije zagađujućih materija u zraku. Na ovaj način bit će upotpunjen mehanizam obavještanja građana o kvaliteti zraka jer će, uz ranije postavljene displeje koji pokazuje vrijednosti zagađujućih materija nakon analize 24 sata praćenja putem mobilne stanice, novi eko-displej promptno obavještavati građane o trenutnim vrijednostima koncentracije



Novi displej prikazivat će trenutne vrijednosti koncentracije zagađujućih materija u zraku

zagađujućih materija. Svi ovi podaci koje prikuplja Općina Kakanj predstavljaju osnov za intervenciju u slučaju potre-

be, u skladu sa zakonskim procedurama, kako bi se sačuvalo zdravlje stanovnika općine Kakanj.

Izvod iz intervjuja koji je objavljen u BH Business Magazinu

MENSUR JAŠARSPAHIĆ- SURI, NAČELNIK OPĆINE KAKANJ

POSLOVNE ZONE SU ZA INVESTITORE ŠANSA ZA REALIZACIJU PODUZETNIČKIH IDEJA, A ZA OPĆINU ŠANSA ZA JOŠ INTENZIVNIJI PRIVREDNI PROGRES

Tekst: Rašid Hakić

GODINE STVARANJA URBANE GRADSKJE SREDINE

BH BUSINESS MAGAZINE: Šta je predstavljalo osnovne karakteristike privrednog ambijenta općine do 1992. godine ?

JAŠARSPAHIĆ: Naša lokalna zajednica bila je jedan od centara industrijskog razvoja bivše države.

Nosioci privrednog razvoja općine bili su, i ostali, Rudnik mrkog uglja „Kakanj“ koji je 1992. godine zapošljavao oko 5.500 rudara, a danas zapošljava oko 2.150 uposlenika sa godišnjom proizvodnjom od oko 1.200.000 tona visoko kaloričnog uglja, zatim Termoelektrana „Kakanj“ koja je zapošljavala preko 1200 radnika, a danas ima oko 650 uposlenih sa godišnjom proizvodnjom od preko 2.100.000 Mwh. U Tvornici cementa „Kakanj“, koja posluje više od 30 godina, 1992. godine radilo je preko 650 radnika, a danas radi 370, sa godišnjom proizvodnjom od 600.000 tona visokokvalitetnog cementa za domaće i tržište regiona.



Mensur Jašarspahić Suri

Tvornica rudarske opreme „Rudstroj“, koja zapošljava oko 200 radnika, smještena je u užem dijelu grada i ista prati potrebe svih subjekata u okruženju i šire.

Treba spomenuti i bivše pravno lice „Šumarstvo“ Kakanj, koje je transformacijom i formiranjem kantonalnog JP ŠPD ZDK sa sjedištem u Zavidovićima, prešlo u poslovnu jedinicu pomenutog preduzeća. Ovo preduzeće zapošljavalo je 175 radnika, godišnji

etat sječe iznosio je oko 40.000 kubnih metara drvnih sortimenata, sa omjerom 7- 3 u korist crnogorice. Sve ove količine oblovine prerađivane su u omjeru 95 % u „Krivaji“ u Zavidovićima, a ostatak od 5% u manjim pilanama u užem okruženju.

**PRIJERATNI
USPJEŠNO TRASIRANI
POSLOVNI RAZVOJ
– BITAN ČINILAC
PRAVOVREMENE
I UČINKOVITE**

TRANZICIJE VLASNIČKIH ODNOSA

BH BUSINESS MAGAZINE: U kojem obimu i sa kakvim efektima je realizovan proces tranzicije vlasničkih odnosa, šta danas čini privrednu mapu općine Kakanj i koju ulogu u ukupnom privrednom ambijentu ima privatna poduzetnička inicijativa?

JAŠARSPAHIĆ: Privatizacijski proces na području naše općine, zaključno sa prošlom godinom, iz nadležnosti Agencije za privatizaciju ZDK, okončan je oko 98 %. Privatizovana su sva preduzeća iz društvenodržavne svojine. Njih 13 bilo je u nadležnosti kantonalne agencije. Negativne refleksije u ovom procesu javile su se kod privatizacije dva preduzeća i to u „Poletu“ i „Pilani“, čime je prouzrokovan prestanak rada preduzeća, pri čemu je 120 radnika ostalo bez posla.

Dva glavna nosioca privrednog razvoja općine, RMU Kakanj i Termoelektrana „Kakanj“, su subjekti koji pripadaju energetsom sistemu JP „Elektroprivreda“ BiH d.d.

Na području Općine registrovano je više od 200 pravnih lica, od čega



Gradska jezgra

su svega 3 subjekta državno vlasništvo, a ostali su 100% u privatnom vlasništvu. Trinaest bivših društvenih preduzeća sada je u 100% privatnom vlasništvu, među kojima je i Tvornica cementa „Kakanj“, privatizovana 2000. godine. Danas zapošljava 370 radnika sa proizvodnjom od 600 hiljada tona cementa godišnje, od čije se prodaje ostvari blizu 100 miliona KM bruto realizacije i 40 miliona KM dobiti.

Stepen i ulogu privatnog poduzetništva najbolje ilustruju podaci po zbirnom Izvještaju o poslovanju pravnih lica za 2009. godinu, iz kojih je vidljivo da je cjelokupna kakanjska privreda ostvarila ukupan prihod u iznosu od 658.000.000 KM, u čemu RMU „Kakanj“ i Termoelektrana „Kakanj“ učestvuju sa iznosom od 280.000.000 KM, a ostatak od 378 miliona predstavlja vrijednost ukupnog prihoda svih ostalih preduzeća koja su

u privatnom vlasništvu

I po svim ostalim pokazateljima, a posebno po ostvarenju neto dobiti u 2009. godini, privatna preduzeća učestvuju u istom i većem omjeru, pa se može konstatovati da u kakanjskoj privredi dominantnu ulogu u ostvarivanju pozitivnih pokazatelja imaju privatna privredna društva.

OPĆINSKA ADMINISTRACIJA – EKSPEDITIVAN SERVIS U SLUŽBI GRAĐANA

BH BUSINESS MAGAZINE: Šta predstavlja težišne aktivnosti općinskih organa i službi u cilju stvaranja preduslova za ekspanziju privrednih aktivnosti?

JAŠARSPAHIĆ: Općina Kakanj je u procesu izgradnje poduzetničke zone Vrtlište, planirane površine 10 hektara. Osnovna namjena ovog prostora je industrijsko-poslovna. U okviru zone predviđa se odvijanje niza djelatnosti, koje su po svojoj prirodi slične i

čije je međusobno funkcionisanje lako ostvarivo, te ni u jednom segmentu ne dolazi u koliziju.

Zona se nalazi oko 2 kilometra od gradskog centra i isto toliko od priključka na modernu autocestu Sarajevo - Kakanj - Zenica, dok je udaljenost od željeznice oko 1 kilometar. Poduzetnička zona ima pristup sa asfaltiranog industrijskog puta za Površinski kop Rudnika Kakanj, što znači da je do poduzetničke zone izgrađena adekvatna saobraćajnica. Potrebno je sagraditi primarnu saobraćajnicu kroz poduzetničku zonu koja će omogućiti saobraćajni pristup parcelama.

Pripremni radovi za izgradnju zone, kao što su nivelacija terena, su urađeni. Što se tiče glavne infrastrukture, električne energije, vode, kanalizacije i telekomunikacione mreže, ista se nalazi ili na samoj lokaciji ili u neposrednoj

blizini lokacije.

Prostorno - planska i provedbena dokumentacija, kao i glavni projekti infrastrukture za zonu Vrtlište, već su urađeni. Ukupna finansijska ulaganja u formiranje poduzetničke zone planirana su u iznosu od 2.870.000,00 KM, a značajan dio sredstava u pripremu lokacije, izradu dokumentacije i infrastrukturno opremanje zone već je investiran od strane Općine Kakanj.

U saradnji sa GAP-om Općina Kakanj je, preko Tima za izradu Plana privlačenja investicija, pripremila Poslovni profil Općine Kakanj i Plan privlačenja investicija Općine Kakanj, koji je pred usvajanjem.

U 2010. godini, Općina je u saradnji sa World Vision-om finansirala obuku 25 kandidata za izradu poslovnih ili biznis-planova. Na kraju obuke je organizovano takmičenje i odabir osam najboljih biznis-planova, od kojih su četiri bila iz oblasti poljoprivrede i četiri iz oblasti trgovine i obrta. Projekat je koštao oko 14.000 KM.

Izraženu podršku privrednom razvoju ilustruje i podatak da je u 2008. godini u Budžetu Općine Kakanj bilo predviđeno i uloženo 20.000 KM i za podsticaj malim i srednjim preduzećima.

U okviru navedenih aktivnosti, Općina Kakanj redovno dobija podršku za realizaciju strateških aktivnosti predviđenih akcionim planovima i Strategijom razvoja Općine Kakanj.

U tom smislu, za Poduzetničku zonu Vrtlište, Federalno ministarstvo poduzetništva, razvoja i obrta je opredijelilo sredstva u iznosu od 115.000 KM u 2008. i 96.000 KM u 2009. godini.

NOVE POSLOVNE ZONE- NOVE RAZVOJNE ŠANSE

BH BUSINESS MAGAZINE: Šta predstavlja strateške planske aktivnosti u tekućoj godini i dugoročnom periodu?

J A Š A R S P A H I Ć : Strateške aktivnosti po pitanju privrednog razvoja i investicija Općina Kakanj u narednom periodu ima namjeru provoditi kroz realizaciju utvrđenih i prepoznatljivih lokacijskih paketa na području Općine, i to: realizacijom projekta nove poduzetničke zone Vrtlište, o čemu je već bilo riječi.

Ništa manje značajan nije niti projekat poduzetničke zone "Bare", čiji je lokacijski paket u pripremi. Prvobitna površina predviđena za razvoj poduzetničke zone „Bare“ je 7,5 hektara. Zemljište je

općinsko. Lokalitet je u neposrednoj blizini gradskog centra, te glavne komunikacije i autoceste Sarajevo - Kakanj - Zenica. Ostala infrastruktura se nalazi u neposrednoj blizini lokaliteta. Potrebno je napomenuti da se na lokalitetu Bare nalazi staro rudničko odlagalište.

Nakon iskorištenja velikih količina haldije stvorile bi se mogućnosti proširenja lokaliteta, poboljšanja mikroklimatskih uslova, a postigao bi se i finansijski efekat. Bitno je naglasiti da je korištenje jalovine kao sirovine poznato u industriji građevinskog materijala, te su već određene inozemne kompanije iskazale interes za instaliranje kapaciteta na tom lokalitetu.

Koncept razvoja ovog lokaliteta u perspektivnu industrijsku zonu potrebno je promatrati kroz mogućnost iskorištenja jalovine kao sirovine i na taj način oslobađanju prostora za razvoj lokaliteta koji bi omogućio smještaj malih i srednjih industrijskih kapaciteta.

Ideja kreiranja ove



Kakanj razbija predrasude o sivilu rudarskih gradova

poslovne zone je u inicijalnoj fazi i potrebno je uraditi preinvesticijsku studiju koja bi definirala modalitete razvoja i upravljanja ovom zonom, obavezno uzevši u obzir i efekat korištenja jalovine kao resursa u industriji građevinskog materijala.

U općini Kakanj se nalazi zimsko-ljetno izletišta Ponijeri, koje je opremljeno ski-liftom i drugim pratećim infrastrukturnim objektima za skijanje. Danas je to izuzetno posjećeno mjesto, kako od strane građana općine Kakanj, tako i turista iz drugih općina. Zbog velikih šumskih bogatstava i izuzetnog kvaliteta vazduha ovo područje proglašeno je vazdušnom banjom. Resursi potrebni za razvoj regionalnog turističkog proizvoda više su nego evidentni.

U toku je izrada Regulatornog plana Ponijeri, na kojem rade Zavod za planiranje i izgradnju Općine Kakanj u saradnji sa Službom za urbanizam,

imovinsko-pravne poslove i katastar Općine Kakanj.

Čitavo područje naselja Ponijeri nalazi se u okviru granica spomenika prirode „Tajan“. Dio spomenika koji se nalazi na području općine Kakanj površine 910 hektara, spada u drugu zaštićenu zonu, a zakon propisuje mjere zaštite i dozvoljene aktivnosti na ovom području. Mogućnost korištenja ovih resursa za razvoj komercijalnog turističkog proizvoda, ne samo od lokalnog već i regionalnog značaja, zahtijeva sistematičan pristup definiranju buduće izgradnje i upravljanja.

I u narednom periodu bit će nastavljena maksimalna angažiranost osoblja Općine, Općinskog vijeća i Zavoda za planiranje i izgradnju na projektima koji omogućavaju više radnih mjesta, više prihoda, više sadržaja za djecu, mlade itd., a to su:

- Izgradnja industrijske zone I na površini od 100 dunuma;
- Planiranje II indu-



Ski-staza Ponijeri

strijske zone - Bare -;

- Izgradnja kružnog toka saobraćaja na ulazu u grad Kakanj;
- Izgradnja sportskih igrališta za mlade u gradu i u mjesnim zajednicama;
- Pomoć u izgradnji druge gradske džamije u gornjem dijelu grada;
- Izgradnja - rekonstrukcija mostova: Kakanj II, kod bivše stočne pijace, Tršće, kod mlina, Modrinje-Žičani most, Podhodnjaci - tunel ispod željezničke stanice za naselja Bičer, Slijevnice itd;
- Proširenje glavne gradske ceste za stvaranje uvjeta za sigurnije odvijanje saobraćaja kroz cijeli grad;
- Izgradnja sportskog kompleksa u mjesnoj



Novoizgrađena dionica autoceste

zajednici Doboj ili Povezice sa gradskim bazenima;

- Proširenje mreže toplotnog zagrijavanja stanova, kuća i preduzeća (željeznička stanica, Povezice, Bičer, Papratnica, Kujavće, Slapnica, Obre, Podbjelavići, Brežani, MZ Kakanj II, Zgošća, Bukovlje, Alagići,

Demiri, itd.)

BH BUSINESS MAGAZINE: Gospodine Jašarspahić, kakav je Vaš stav o sintezi „općinski načelnik- menadžer“ ?

JAŠARSPAHIĆ: To je u današnjem ustavnopravnom okviru jedan od najtežih i najzahtjevnijih poslova, koji zahtjeva puno intelektualnih

sposobnosti i znanja iz svih oblasti života i rada, a posebno u profiliranju politika:

- razvoja i podsticanja poduzetništva u privredi, van privrede i u društvenim djelatnostima;
- politika i pomoći ženama, mladima, djeci, sportu, kulturi itd.

Posao načelnika mora da bude operativan, kreativan, inovativan i praktičan, a iz toga mora proisteci rezultat da se djela vizuelno očituju, što građani znaju cijeliti i poštovati, jer mi načelnici imamo od građana glasanjem dobijene mandate da gradimo nove sadržaje za dobrobit naše djece i generacija koje dolaze.

Obavijest Stručne službe za poslove općinskog načelnika

Poštovani građani, kako biste iskazali želju za razgovorom sa općinskim načelnikom Mensurom Jašarspahićem – Surijem ili potrebu za hitnom jednokratnom pomoći, molimo popunite zahtjev

Sa ciljem osiguranja transparentnog i efikasnog rada općinskih organa uprave, u Općini Kakanj definirane su određene procedure koje podrazumijevaju popunjavanje obrazaca kako bi građani iskazali želju i potrebu za razgovorom sa općinskim načelnikom Mensurom Jašarspahićem - Surijem, te kako bi zatražili interventnu pomoć u slučaju teške materijalne situacije, nesreće, elementarne nepogode...

Stoga, obavještavamo građane općine Kakanj da razgovor sa načelnikom ili interventnu pomoć zatraže popunjavanjem zahtjeva za razgovor ili zahtjeva za pomoć koje mogu dobiti u Centru za pružanje usluga građanima Općine Kakanj (šalter-sala), te u matičnim uredima Bilješevo, Kraljeva Sutjeska i Brnjic. Na obrazac se upisuju osnovni podaci o podnosiocu zahtjeva, te razlog iniciranja razgovora, odnosno razlog iskazivanja potrebe za hitnom jednokratnom pomoći. Navode iz obrazloženja inicijative za razgovorom, odnosno zahtjeva za pomoć, potrebno je potkrijepiti prilaganjem

dokumentacije koja dokazuje tvrdnje iz obrazloženja. Prije popunjavanja zahtjeva za pomoć, molimo građane da se upoznaju sa kriterijima za dodjelu jednokratnih novčanih pomoći.

Nakon podnošenja zahtjeva za razgovor ili zahtjeva za pomoć, građane molimo za strpljenje i razumijevanje jer općinskom načelniku pristiže veliki broj zahtjeva koje je potrebno obraditi, uvrstiti u bukirane planove za prijem kod načelnika, provjeriti opravdanost zahtjeva u skladu sa kriterijima, određeni navode provjeriti u npr. Centru za socijalni rad, Elektro-distribuciji ili nekoj drugoj ustanovi... Ipak, bez obzira na veliki broj zahtjeva za razgovor ili pomoć, svi zahtjevi se rješavaju u razumnom roku i u skladu sa temeljnim opredjeljenjem općinskog načelnika da ostvari neposrednu i masovnu komunikaciju sa građanima kako bi čuo njihove potrebe, probleme i nedoumice i kako bi, u skladu sa mogućnostima, pomogao rješavanju problematike koju iznose građani.

Vremeplov: Dešavanja u Kaknju 1991. godine, tekst: U ratnom okruženju (Kakanjske novine, broj 337, 11. X 1991)

Simuliranje mira i života onakvog kakvog bi htjeli da živimo nakon danonoćnih dežura ispred radio i tv prijemnika, iz dana u dan postaje teže. Stid zbog laganja cijelog svijeta i (već dobro) smiješnog potpisivanja kojekavih sporazuma o prekidu vatre, te dječijih otuživanja u stilu: "...ti si prvi počeo" pritišće polako, no sigurno, sve nas. I u inat svemu tome trsimo se i živimo, ali 'nako.

Protekli dani, topli jesenji mogli bi se pamtiti i kao vrijeme kada je sve bilo redovno. Sitnice koje život znače, makar one bili i iritirajuće, obilježile su i mjesec koji je za nama. Tako se jedan naš sugra-



Gužve zabilježene 1991. godine zbog nestašice goriva danin našalio i prijavio lažni požar na štali kod đamije u Donjem Kaknju, u Termoelektrani su, zbog teškoća na 110 kilovatnom postrojenju, iz proizvodnog procesa „ispali“ svi pogoni, slavine su u gradu (6. IX 1991, od osam do 16 sati) bile suhe zbog radova na vodozahvatu, a gornji dijelovi vodu su

dobili tek oko 21 sat. Dva dana kasnije, dio područja bazena Trstionica bio je bez struje jer je došlo do kvara dalekovoda u Čatićima. Ista sudbina zadesila je žitelje Krševca (14. IX 1991), ali radnici Elektro-Kaknja nisu mogli izaći na teren, jer - nisu imali goriva. Dotle, zaposleni u JP „Grijanje“ užurbano vrše posljednje pripreme za predstojeću sezonu grijanja. Sat vremena bio je blokiran prevoz uglja na Površinskom kopu Vrtlište, pošto su privatni autoprevoznici tražili gorivo od Rudnika, a ubrzo potom prevoz je ponovo stao, ali sada zato što ni Rudnik više nije imao goriva na svojoj pumpi. Dječija igra i nestašluci koštali su plast sijena koji je nestao u plamenu u Hrastovcu, centrala PTT-a u Kraljevoj Sutjesci bila je van pogona 24. IX 1991. (uzrok kvara nepoznat), a 26. IX 1991. izlaz sa Autobuske stanice blokirala je kolona automobila (red za gorivo). U

Podborju je požar „progutao“ pet dunuma sadnica...

Kakanj je ovih dana posjetio i Zijah Sokolović - Zike, sa monodramom „Glumac je glumac“ (Diskoteka „Cor“). Pune ruke posla imali su matičari i babe: rođeno je 17 djevojčica, 19 dječaka, te sklopljeno 46 brakova.

I dok na jednoj strani život prolazi kao da se ratuje tamo negdje daleko, dotle vijesti koje stižu u ovdašnji Centar za obavještanje, govore nešto sasvim drugo: 21. IX 1991. pored Kaknja je prošla vojna kolona od 7 vozila prema Sarajevu bez ikakvih problema i zaštoja, 22. IX 1991. kod Bilješeva je ostalo u kvaru sedam vozila (do 19.30 sati) iz vojne kolone koja je išla prema Banja Luci, a u 12 sati i 50 minuta (26. IX 1991) u Centar je javljeno da su u Donjem Kaknju, kod Plavog mosta, parkirana dva vojna transportera i da se iz jednog od njih pucalo! Sumorna stvarnost je i 200 roditelja koji su proteklog mjeseca, posredstvom ove institucije, pokušali da uspostave telefonske veze sa svojim sinovima - vojnicima, prve izbjeglice prijavljene su u ovdašnji Crveni krst... 'Nako ili 'vako, tek življenje u okruženju rata nije ni malo ugodno. (se.j.)



Detalj iz centra grada, zabilježeno 1991. godine

Vremeplov: Priča sa YU 4EKK, Spajanje pokidanih veza, Kakanjske novine, broj 340, 28.11.1991.godine)

Oni rijetko govore o svojim uspjesima, susretanjima i radu. Naći ćete ih u ulici Vase Miskina P +3, u prostoriji sa radio-uređajima i zidovima prekrivenim raznim priznanjima, diplomama, nagradama. U skromnom okruženju druže se sa čitavim svijetom, preživljavajući tuđe drame, pomažu drugima. Stižu nenajavljeni, tiho, tamo gdje su najpotrebniji. U nesreći su prvi, ponekad i u veselju, kod onih koji ih se sjete. Oni su radio-amateri. (---) Djelatnost njihova odiše bogatstvom. Priskaču u pomoć i prilikom nepogoda kakve su, recimo, u Kaknju bile poplave i požar na vozu kod Poljica. Javnost je o tome saznala i putevima radio-veza. I tu prestaje njiva priča. Rekoše nam da nisu tu da

bi se hvalili, nego zato što vole radio-amaterizam i da bi drugima pomagali koliko mogu.

I danas su opet na sceni. Ne svojom, nego tuđom voljom postali su nezamjenjivi. Ljudske tragedije ponovo struje frekvencijom YU 4EKK. Ratna razaranja i prekidi komunikacija pišu neke nove, bolne priče. U blokiranim, razrušenim, bombardovanim gradovima, kasarnama i naseljima ostao je neko nama drag. Da li je živ, ranjen, zarobljen? Tamo gdje drugi ne mogu, svojim talasima prodiru radio-amateri. Za Kakanjce i ne samo za njih, ovdje dežura četa mala, ali odabrana, izvanredno osposobljena. (---)

„Najfrekventniji nam je Dubrovnik. Do sada smo 20 puta uspostavljali vezu sa tamošnjim

kolegama, a desetak puta sa nekim drugim mjestima i kasarnama. Pitanja su gotovo identična – da li je živ, zdrav, kako izdržava ratne strahote? Odgovori su na svu sreću, davali bar kratkotrajnu utjehu. Ljudska briga i bol su najžešći u ovakvim trenucima i neminovno se prenose i na nas. Teško je ostati ravnodušan na takve patnje. Boli nas i što ne možemo prodrijeti u Vukovar i Pakrac“, priča naš domaćin.

Valja pomenuti i njihov rad u republičkom centru, gdje su linije više nego „pregrijane“. Probora vi se u Sarajevu i čitavu noć za prijemnicima. Dobru vijest je najdraže saopštavati, ali su česte i one bolne. I tako bez prestanka. Za YU 4EKK zna se odakle dolazi. (Se.J.)

Most u Donjem Kaknju izgrađen je 16. septembra 1979. godine

Stari problem stanovnika Donjeg Kaknja i okolnih sela predstavljao je most preko rječice Ribnice, a u samom centru ovog naselja. Izgradnja novog mosta ima dugu historiju. A počela je 1973. godine prilikom izgradnje autoputa Sarajevo-Zenica. Naime, tada je Građevinsko preduzeće „Partizanski put“, prilikom izgradnje autoputa, koristeći stari most, prelaskom svojih teških vozila, onesposobilo ga za dalje korištenje. I preuzelo obavezu da gradi novi. Međutim, neodgovorno ponašanje izvjesnog broja mještana bilo je osporilo njegovo dovršenje. I tako je obustavljena konačna izgradnja. Prošle je go-



Zabilježeno 1979.godine tokom gradnje mosta u Donjem Kaknju

dine mjesna zajednica iz Donjeg Kaknja nastavila ove radove, uz znatne korekcije projekta ovog mosta, jer su i dalje pojedinci osporavali radove, zbog, navodno, neriješenih imovinskopравnih odnosa na desnoj obali rječice Ribnice. I to je, opet, usporilo dalje završne radove, tako da je gradnja mosta trajala

punih godinu dana. Ove radove izvodila je mjesna zajednica, a uglavnom, radnim akcijama i iz sredstava mjesnog samodoprinosu.

Konačno, glavni radovi betoniranja ploče na mostu izvršeni su 16. septembra 1979. godine, kada je na radnoj akciji uzelo učešća oko stotinu mještana.

(---) Dužina mosta je 20, a širina 6 metara, a cjelokupna konstrukcija je od betona i željeza. U njega je ugrađeno oko 100 kubika betona i nekoliko desetina tona željeza.

(---) Vrijednost ovog objekta procijenjena je na oko 120 miliona starih dinara.

Zahvaljujući mjesnoj zajednici koja je bila organizator njegove konačne izgradnje, odnosno mještanima Donjeg Kaknja i okolnih sela, premoštena je rječica Ribnica i riješen stari problem, koji je godinama tištio stanovnike ovog kraja.

Seid Delibašić

Preneseno iz: Kakanjske novine, 10. oktobar 1979. godine, broj 13

DAN TURSKE U KAKANJU



KAKANJ'DA TÜRK GÜNÜ

30.08.2010. GODINE

